

**COVID-19: Subkluster baharu Bali, 20 termasuk anggota kesihatan
dijangkiti di Kuantan**
Astro Awani
13 April 2020
Harits Asyraf Hasnan,

PUTRAJAYA: Kementerian Kesihatan (KKM) mengenal pasti dua subkluster COVID-19 saling berkaitan di Kuantan hasil aktiviti tertumpu yang telah dijalankan melalui pengesanan, penyaringan dan ujian ke atas kumpulan sasar yang berisiko tinggi

Ketua Pengarah Kesihatan, Datuk Dr Noor Hisham Abdullah berkata kluster individu dalam siasatan (PUI) Bali di Kuantan adalah satu kluster yang melibatkan golongan pesakit dan beberapa anggota kesihatan dari sebuah pusat perubatan di Kuantan.

Ujarnya, sehingga hari ini, 20 orang telah dikenal pasti di dalam kluster ini, iaitu 14 orang sedang dirawat di Hospital Tengku Ampuan Afzan (HTAA), Pahang; dua orang telah sembuh; tiga orang dirawat di unit rawatan rapi (ICU) manakala seorang telah meninggal dunia iaitu kes ke-1,575.

"Kes indeks iaitu kes ke-4,684 bagi kluster ini mempunyai sejarah perjalanan ke Bali, Indonesia.

"Beliau kemudiannya mempunyai kontak rapat dengan kes ke-1,575 iaitu abang kepada kes indeks. Kes ke-1,575 kemudiannya telah menjangkiti tujuh kes generasi kedua dan 11 kes generasi ketiga.

"Terdapat 339 kontak rapat telah dikenal pasti dan ujian saringan COVID-19 telah dijalankan, termasuk 202 anggota kesihatan," katanya pada sidang media harian COVID-19 di sini pada Isnin.

Malah, ujarnya daripada keseluruhan jumlah tersebut, terdapat tiga anggota kesihatan yang terlibat dalam kluster ini.

**© 2020 Astro Awani Network Sdn. Bhd.
(535275-D) All Rights Reserved.**

Source: <http://www.astroawani.com/berita-malaysia/covid-19-subkluster-baharu-bali-20-termasuk-anggota-kesihatan-dijangkiti-di-kuantan-238136>